

Situacija u vezi s kriminalom u Sarajevu

Osumnjičeni Ramiz Delalić zvani Ćelo se nakon navodnog napada na pripadnika policije prošle subote trenutno nalazi u pritvoru u Sarajevu. Pri pokušaju patrole saobraćajne policije da ga zaustavi, on je svojim vozilom, kako se sumnja, udario policajca, a zatim na brutalan način prijetio i njemu i ostalim osobama.

Protiv Delalića su podnesene brojne krivične prijave, zbog kojih on nikad nije krivično gonjen. Među tim prijavama su i prijave za ubistvo, teške tjelesne povrede, nasilničko ponašanje, razbojništvo i teške krađe u periodu od 1990. godine do danas. Jedan od težih zločina za koje je Delalić optužen je ubistvo tokom srpskog pravoslavnog vjenčanja 1992. godine. Od mnogih slučajeva se moralo odustati nakon što su svjedoci bili pretučeni, zastrašivani i nakon što im se prijetilo, zbog čega su povlačili svoja svjedočenja.

OHR i UNMIBH su ubijeđeni da se već i previše dugo ignoriše situacija u vezi s kriminalom u Sarajevu. Ovo je prilika da se ona počne rješavati i da se osumnjičeni poput Delalića pozovu na odgovornost. Pozivamo nadležne organe na svim nivoima da izvrše svoje obaveze prema javnosti tako što će na energičan način iskorijeniti kriminal i odlučno goniti sve one koji krše zakon, pa čak i one sa političkim vezama. Takođe apeliramo na njih da zaštite svjedoke koji ponude svoje svjedočenje.

Postoji potreba da se u ovom gradu uspostavi vladavina zakona kako bi on postao bezbjedno okruženje za sve njegove građane te da bi se ohrabrio povratak. Činjenica da se osumnjičeni za krivična djela krivično ne gone je u suprotnosti sa principom reda i zakona, kao i sa Daytonskim mirovnim sporazumom.

UNMIBH je obavijestio Kantonalnog ministra pravde da će pažljivo pratiti istragu i krivično gonjenje Delalića, dok je OHR održao razgovore sa ostalim kantonalnim zvaničnicima i ponudio svoju pomoć. OHR i UNMIBH očekuju da će istraga i krivično gonjenje biti provedeni na ozbiljan i rigorozan način. Takođe apeliramo na Federaciju da hitno donese zakone o anonimnosti i zaštiti svjedoka kako bi se garantiralo da građani mogu bezbjedno i slobodno svjedočiti u značajnjim slučajevima vezanim za organizovani kriminal.